

楊文弱先生集

楊文弱先生集卷之五十四

明 武陵楊嗣昌文弱著

農秀

山梓

農峻

孤兒山松同輯

孫

農介

同較

山櫟

農彥

詩

五言近體

任丘曉晴

蟠蟠泥中行挾日未千里朔雪一辭花莓莓雨之始晡投

孤館暮動地驚風起應知明發晴疲寢遂能美雞鳴叫僮
僕起視各殊喜星寒曉霧白月落諸峯紫出門望東方朱
霞半天綺丹砂大一丸震盪出海水高林映水末絕岸明
沙觜俄頃陽烏力頓使沉陰徙四山吞溼雲百卉挺寒蘂
野田青麥苗茸茸初髮似蒿根白鷗鳥點點水澌裏行子
樂縱觀居人話相倚藹藹春風和東作時伊邇小兒行叱
牛老翁臥看豕晨炊餅餌熟羅羅族孫子老婦分食均笑
言啞可擬欲問征途人遠游何如此

黑石渡望嵩高山

何年黑石渡滄注青山次山山若縈手生態狎而至流鶩

潑斜川積翠瀉幽筍中央忽亭聳作勢處尊佐莊嚴若古
佛跌坐斂姿媚東西青鳳凰延頸張兩臂千支競赴冢翔
驚如一意陵阿若在眼焦府亦瞪視西山日欲銜餘光復
森麗篋龍騰鐵花海鳥布金翅石髮細可數山膚繡如刺
我聞海內經此是天中地百靈會風雨二室秘神異飲食
若經書自然不期致自昔快茲游向平良獨智宗生以一
室老億非擬議

游靈巖

在桃源縣

皇帝萬曆春四十又一年我游靈巖寺寺在靈巖俗板扉
若貧家石池漫蝸涎陰塵糞古佛老殿牛屋羶僧來土瓦

中見客腳自跣頭須一寸禿鼻若豕鬣鬚導客出大門避
影並流泉泉流發何許洞穴藏神淵洞門何所有奇礪猛
而顛森然虎豹怒呀呀九關前洞中何所見窈窕穹窿穿
百人受高會五丈吞曲旃仰視額角上忽若撞青天蝸皇
巧鍛鍊剗剗無一全九鳥射日落萬戶修月弦又如拔厚
地倒壓空濛烟丘陵俯鬱確草樹敲絲茅干凹與萬凸磊
砢何不平鬼髓靜滴瀝神精瀉涓涓有若手佛母撒乳干
佛咽一乳五百道兩乳千道懸歛若風扣絲映若冰泮田
鼓鍾或間作餘韻浮空傳嘈呖而歎坎銅銅以齧齧凝成
萬物象妙出陶氏埏朝榮或如茵夜舒或如蓮三年或如

刻頃刻或如仙奇葩不可識海外來張騫白齒粲河鯨簡
珠爛漚蠃老蛟蛻鱗死黠狎掛角眠怪狀杳難述聘若烏
鼎鑄異骨每欲泐數尺妥如椽又如載防風一節車可專
羸剖姜維膽老桀李陽拳却後青琅玕膚秀色亦妍貌之
不可得載大不舍焉忽思大秦人欲掛珊瑚楨鐵網一萬
目鑿鑿海底聯笑指此石是何時出塵釜咄此未爲絕後
洞乃爭先洞門如廣廈石理如清漣笨簾若修蛇百尺而
蜿蜒蝙蝠如燭銀厭壽歲一千舍旃入洞腹古壁瘦且堅
鳳體白蕩蕩龍泓碧澶澶勇猛一丈夫相好何精妍面容
詎狹長滿月足光圓衣紋數毫髮宋繡徒戔戔天風一以

鵬脫壁如飛仙海水渡瀕湧假楫非舟船前瞻行願王二
者來翩翩左袖拖修雲偏袒其右肩七寶飾瓔珞果王與
珠璣六牙轡香象舉體如細氈四壁淨一色離堆兜羅綿
我疑三大士出世爲因緣乘獅偶然後瞋乎其不鞭若人
把炬火直入窳幽玄應復睹文殊莊嚴若智賢緊誰遊此
像微妙浩無邊鬼斧不敢鑿眞宰因其然萬古智燈燭六
時香雨湔昔聞顧虎頭擬畫維摩禪一軀點兩眼驟享百
萬錢裴旻拔劍起道子揮毫顛老筆刷如鐵醉墨爭奇鮮
彼一手腕力蹊徑猶可沿又如衆生類嚴飾諸佛祇塗以
膠漆布範以鐵錫鉛燃以白旃檀布以黃金甌巧匠紛刻

錢多財能白捐何如一片石生長無煩孺窪窪拊弱浪賦
澤擎驚鱣以茲凝濁姿幻出清且嫺安知耆闍窪忽現挑
花川昔時聞一峯東來飛以翺墮彼靈隱側硜爾纔一卷
胡然浪得名藉甚東西偏我欲乘風飄擲之使西還嗟此
瀾中石徒衆累萬員吾將要生公振錫來敷宣妙諦悅衆
心天花飛八埏時時坐聽法會得成佛便而今且奚適桃
花洞連連花開不可見水脈流潺湲轉側窺石竇獨往不
可駢睂然一鏡徹缺月張空卷安得有埽人出入恣踴躍
怒抉洞中石尋源溯濺濺折麻持作楫剖竹持作舩鑿開
混沌入夢破華胥旋不然遣漁郎狡獪往復遄爲我言其

中桑麻間市屨衣冠古時制男女多嬋娟其初定何許避
世到此權浸假不復出世代忽以遷我始爲歎惋聽已心
鳴嗚行將率妻子畊鑿游獵畋傳與好事人搜之入奇編
棄置且歸去空山號杜鵑

秋日牽船至陬溪卽事

寒雲覆江空敗絮展庭晝初陽籠黑陰一點如赤豆冷風
靜無響澄水逝不皺闐然百丈挽塋爾一鑑透絲牽動蛇
蚓影紐摹篆籀盤旋出迴文敏捷成急就初如臨池書俄
以掣筆走盃弓一盪漾倏閃變弛殼枯藤在素颺秋雨窺
屋漏將凝忽大振欲絕乃重搆駟驚盡遙起鰕駭畏潛避

冥飛度雙妾浩沒翻衆漚亭惟白鷺皎皎立霜瘦劣彼
尻船士不前乃逾後謂言適莽蒼意若須信宿朋爭便齒
擊勢督直耳衰祈俯而得仰未步且頻驟緣如磨上蟻登
似水照猶何由勸其行迴岸指醇酎乍欣如拔腳却望已
伸脰終懷被欺誘不肯遂奔湊我行既迂邐我目亦審覲
疎沙墮新痕渴石堆古繡高林赤柏橡短屋黃橘柚特雖
秣稻儉俗本魚鰕富車罾及槎斷竹餌與絲覆園又刺清
淺立棧把灘溜魴鯉不倒尾鷓鴣豈虛味飛舸趁發機坐
薦而墨守淺深行異冑動靜得有候勃然雖奮擲詎脫反
如授眞憐水族美頗厭盤膏臭信知江頭樂昔恨情不謬

萬慮坐自煎不破擬誰疵悲歌費文辭彼誤此還又吾行
改宦轍幽事華枕漱臨淵漫健羨秉釣學童幼邾莒小國
中瑣碎與窮究非惟快清賞庶以畢年壽方舟逝雖晚有
酒君莫詬

送史元亮北上

昔吾與君偕解褐得縣令吾嬾剗銅章把書歸短檠猶持
兩月板始答千里聘勞生可憐想疾止無動競君也盍歸
來五斗稱謝病何曾憚折腰至則拜嘉慶寧辭簿書冗剖
邑靜如鏡良由達者心舒卷適其性君今復何往毋乃迫
時命東山臥而起捉鼻事堪廢脂車行出門一日隔春孟

南土恒蚤泄柳活交相映風塵大河北雨雪朝猶勁提壺
強雙醖戴笠須曲柄君恩萬里途莫以七尺輕基書且用
廉旋棄不可更吾徒非面交衝口欲相評如無鹵莽懼送
子及周鄭一出自一止其敢齊執政他時如憶君但學雒
生詠

山松曰史公有鼻疾故云

喜雨

赤地等然石青山無涇雲桑麻與杭稻將慮殫爲焚使君
麾五馬步禱何紛紜天高聽幸卑呼叫遂能聞盲風甫翕
息震雷自殫礮一雨盡五日河之水沄沄田翁把鋤柄笑
勢不斂齟齬盈使低注疏梗令芴分萎禾坐潤漑枯岸蒸

氤氲沙鳥鳴載好困鱗相慰羣快雨時霑醉時晴仍薄曛
炎冷相炙擊稻穗抽芬芸昔深不掩裙今蘇沒人盼昔細
如蚤蝨今覩蛇蛟賁昔時桑下人舉脰獨露筋今爲飽食
民築筋以戴盼昔不果嬰孺離根犬狺狺今餘雞鶩粟噉
牛芻千斤昔者出門望但見墟落墳今年大作社伐鼓依
榆枌喧呶萬人聚如以器貯蠹罟魚持作鰾揚粟持作饋
磨刀剝獐羊持作臠與臠大叫勾芒棄歸簾於府君

大雲山

臨湘道中

春山得春情佳氣日方始春雨灑春山濃淡均一洗云何
大道邊千峯萬峯起天空刷纖雲大雲忽生此雲生山半

行雲去山渾似冥冥一抹烟故故隨車徙細憐膚色淨
覺丰神美勃然風霧舉瞪視盡骨髓疏紋有殊態橫術非
一軌離離生翠毛鬱鬱老蒼兕羣嶺俄一聚條若驚濤委
吳宮部美人李陣排娘子戈鋌露帷帳寶髻攢花藥入眼
何透迤百里貪涯涘我欲覩山容無處尋生紙人間族畫
師緩急誰可使要非吳生輩亦遣趙千里雲林瘦輕逸力
小逃奇詭元暉繼阿章反藩而已矣長松一萬樹觸目令
人喜奇姿鬪爛熳羽蓋從天倚萬古蟄龍蛇一旦爭角觝
長人莽千仞身手怒相礙縱橫類支離偃側成坡靡昔曾
登太華目到繼以趾手摩五大夫鱗甲何隨齒茲松有十

百力敵無殊彼託根雖異勢老至自須爾異哉雲山道至樂可忘死明日雲山雲望望何能已

丙辰元日有懷家大人

南魚亦有丙北雁良及辰丙焦獨不盡觸懷多苦辛少小異唧唧許身未憂貧薄宦如薄飲至齒不至斷稍知酒中趣恒以拙自珍每爲達者嗤歡樂不極神恩深忽自失此腸迴所親曰余世間愛遠異世間人俱爲天路客乃願耕桑民青山食冷翠碧水流輕塵自覆一椽茅卑與雞犬鄰門外雪盈尺踪跡不得循形墳此中讀相與辨先秦律娶呂生子悠哉千萬春何用有角冠長驅孑然身嚶嚶雲中

音託爾寧無因

書德山讀碑事寄鍾伯敬

巖風動深竹叩叩楚山寂秋情激清曉不忍廢游歷攬我
步僧寮得茗故忘喫蒼然忽照眼一字縮陰壁連綿復四
五僂僂爲尋覓何知絕妙詞高隱在蒿荻苔封不到處古
雨穿滴瀝鈎搜得偏旁指爪鈍剝剔當其極幽艱與與作
者敵哦之乍成詩聲響破霹靂試欲効雌黃翼蔽誰敢擊
良獨快茲游遂有可書績函碑隔歲年故懷如洗滌

長溪與家大人別

恩深破忍力執手無心覓慷慨笑語間焉知兒女存夫子

出門志悚然憂至尊鬼方盛殺氣關失乃離藩舉職在芟
夷有道清其源何無空拳士况乃宿飽屯一矢未加賊力
盡呼九閭安得將蚩尤飛沙盡爲餐徬徨虛宇內萬慮無
不然所恃自靈長反側旋復安誠爾將車子趨驅固無患
青青在霜葉瘴烟易爲暄極日飛鳥迴往哉慎其轅

二

登車武陵道相送武溪深所慰若依依割慈倍難任朝來
握髮處玄櫛知我心長恐惠文冠能令霜氣侵王事有代
謝艱難多滯淫仰測天耳高不知路所尋寥寥見曙星復
似荷與參何恨不相於悠悠從古今元化有時易愁鴟生

好音清雨灑千山
箚雲失其陰
蠡茲倘終格
未必費誅擒
白簡共朱顏
殷勤同所箴
歸懷自雲水
且願先朝簪

逢袁小修禹州夜坐

君來余未知我往君莫測邂逅無端倪
因緣信奇特均辭
秦人塢花遠川上色大地風毛中而我遭
北翼賞會若云
期期者寧可刻交願未及語語漏不可塞
杯畢復何爲每
至必停勒能令覲面際忽恍成相憶君觀
道旁蠅舠頂分
不得靜聽若無聞原情非嘿嘿况我同癖
者岐路河南北
十日無青山何由療眼食要君從此去但
以一月息却作
西山觀長安春雲黑

看桃花期馬仲良苦脚氣不至作此柬之

春波數十里花浸不知岸
小雨溫風稀力可月加半
有人臥輕舟含藥看及爛
時令兀然醉夢過溪鳥旦
今年好壅杵自強沐猴冠
脫身悠悠中如懼不克追
始來輕千山爰止重一粲
巖方駮瘰地衣背翻苦汗
耳目厚泥沙浸假蝕骨幹
向非足良友何以慰鞮鞢
與子契偏多每事欲同貫
晨餐復暮飲署約兼齒算
而子譏裸裎握腕至驚歎
騎驢遠羅郭念爾一句判
百錢買緋桃邀取蜂蝶看
抱膝非抱荷胡不乘款段
有情如枯株誰與厭澆灌
願挹清冷淵及子似井甃
寄以棹頭吟莫須搥脚讚

寄懷蔡敬夫先生去歲別余德山後寄游武夷諸作
蔡公居沅湘實紀歲歷五余是其百姓行部一再覩胡然
拂衣年彊仕之左右迎見其肝膈未忍欲遮取江寒鴨脚
厚巖氣青竹戶佳話卽難爾停撓快千古至今孤山烟曉
出澹霄宇靈機逗物怪夜夜古湫雨人生不如雀細黠有
毛羽無言夢寐通祇益精神苦前時瀉幽句寄我數葉楮
武夷固神秀斟酌惟石土約貌空香間此以妙明補再拜
吾師平不惜攻我曾嗟哉世態薄老穉甘一乳眉須詎能
安獨骨撐衆腐長懷自無限豈徒文中虎加餐必厭聞正
此不鹵莽

登天柱峯與王鹿父飲酒限次馬仲良與來道之四

十韻

造物爲名山鬼工不能操真氣冥橐中虛動伺籥口莽莽
吹雲烟平蕪秀禾莠蠻方讓靈輿中國則斯取五嶽其職
殷逸者不臣友幽顯刊奠前如日未見斗金泥七十二詎
落俗皇手明代通混茫忽若無而有爭言陟天柱卽帝非
左右巖澗呀呷間化佛生齒曰人生不步目政別詎償負
聞健勿疾攀當遲而皺否吾炊蠟火香子意寒蔓紐攜手
將太虛鹿胃期盡嘔如何青冥際想陰忽注酒大叫拊危
壁不窺亦合缶深杯坐澆午斜景弗畏酉頭恰恣賦顏卷

書信囊垢請爲天帝言視汝鞭其後高尋漸一握下矚影
烟丸眼盡精絕邊能皆靜於帚厥初髮萬仞至乃不凝阜
太極方靜倪形奇未形耦蘊深終古力茲峯遂孤受險豁
外潛思綿綿理何厚左侵亥子位有物峩其首神光隱玄
霧望若不瑩玖云是落雁峯愁予別來久右睇已午遙荆
蜀峻莫剖周諏指掌謬流轉心目咎傲岸房縣山不朝豈
頑醜琳宮萬壑路靜者或農畝松檜入茅茨森然學槐柳
人行布金地衣履鑒髣髴悲仰如一心多生子誰某今觀
覲面失復以萬劫守浮木海波中逢無一二數安得墮地
來不爲奔角走文皇輔世教玄牝良深扣吾汝陟茲巔牟

鄒期不朽

由天柱上下觀仙人隱士王女諸峯酌泉題壁與何

景星詩次馬仲良與徐象一四十韻

游目恐稍恨天人嗇佳時得先了峯極迴後精路岐我夢
食參翠滴滴盈秋期與子江閣要安榴方鬪葵初鴻洞庭
未孤捩思其儀子也跼蹐徒朋心故憐夔踊身觀大地節
節如展披體肅帝座尊寬輕角雲姿金門生日月疏往不
及綦歛得天耳通聞樂非箏篴漢渚遍無象繫星脫然離
掌果開白榆滑足驚其皮渾淪詎名字浪詫驢膺知寒立
久生悸欲下趣轉遲嬌兒劇戀乳將斷若何其步底衆峯

色分妍相競貽奈無舒空足遙心焉盡追青蓮千萬藥高
下淺深池我怪無枯柄根蟠金屈支伊誰把山鏡聚照影
差差付若輞川人爲拈畫中詩取徑夾古壁天閑充鐵驪
磊砢千仞強寧惟十二碁王女髮垂額嫣然侍童姬隱士
獨寤言松門閉逶迤我行默而憇從遠思未宜仙人裂寒
井清我時一厄燥溼有恆性反之猶石脾齋志不能言所
嗟仍重移微雲起幽壑風影吹漣漪舉世飄忽間誰與歸
吾師海中頻大偷殿上恣小遺仕農自言代嘗聞牖中兒
跡已誕其世道爲千古思龍蛇互通詘孔釋詎相疑崩蠶
谷中子毛羽何裊裊信信阻清夜無聞聲采芝身心寧木

石灼灼忍甘悲命也有慧焉毋爲鬼頑癡桃源未秋冷吾
汝歸其湄

入鄖奉訪蔡敬夫先生

古來割席人盡水去之火學余嗟苦卓遷物亦無可苦爲
無心雲空行如宴坐雖無堅定力風來莫吹墮萬物夢爲
周二豪侍猶螺恒恐易由言真君莫欺我陶翁覺天運祥
子之愚情甫堅菹澤存中腸說俱左吾請事斯人其跡仍
未果足知癡網罟慧業不自剝草根炙灰飛微性堪藥裏
幸開顛倒衣出我如明顚

鄖水放舟述別敬夫先生次其舉游百韻

吾尋滄浪初以瀑水爲穉有生則知歸通曲理必逐今時
吳門眼詎見蟠冢翠元氣爲之郵靈液乃其騎海王闢東
郭百谷西奏事咄哉中脾闔咽乃羣碎三百六十谿淨
垢無取置淘其渣滓盡轉復生庶類千億槩莫深能勝一
金翅粉屑龍惺惺曾何異蟲臂怪駭不可嬋潼流往資勢
君看鏡靜間保終鳬驚睡忽作拳毛旋寧知中所謂恐是
孤石根汨入使之恚雄姿安衆蓋驟叱起寒悸或躍其首
昂征泳恣噴吹鼻痕落罟罟挺倪劍器一呼袒偏裨萬
齒森果毅六出五出花三角四角芰以此飾冠纓離合爲
渙萃希微太古色匠苦殊難意空翠澹遠明兼三義斯譬

譬如碧雲衣表裏孤光綴本自無銖絲誰與鳴絡繹莓莓
覆苔草額髮嬰兒昨的的濺珠泉珍盤魚目比折節海螯
加鑿空山甲隄虎落漢塞圍魚浦蜀營閉代往渠谷疎跡
存風雨悶吾行箭枯水瞬眼謝鉤致惟有耳根通非關中
淅淅追懷天覺民近得總持慧一兩大法雲普足衆生衣
投堪水乳契曲敢鍼磁媚昨夜兼晝談吾未測深細先憂
云已後思理纏鈎砌嗚呼四征兵學醫許人費窮觀思慕
海酸悲竟誰濟屋柱大小閒心寒不知寄豈有蒼鬚眉
谷方病避子前久京輦依隱白寮寺幾閱肝膽眞端飽
然識惜哉沉簿頌莫得傾聲氣清時儒人匿索取歲月非

誰入心骨堅靜得其慘悴若夫錚錚者濟輩浪名字寧暇
高閣中束彼升斗計熱腸傷冷沃我病刺深胃生年滄無
爲仕值平漸陂佐箸農尚書委輪兼殿最錢初澀豹囊粟
未儲瓶甌迫窘東師饑單危帝都蔽催科血穿眼中忍不
敢至衾影怪云爲日夜甘苦帶苟收疆圉完皇辭一身墜
舟車問陸海金穀豈惟備黠慘十步光黑風鼓腥翳不知
誰唱賊奔者遂交躓賊信馬上眠洞城無擊刺醉玩漢兒
死餘恥遭謔詈盡發遼陽資半載齋所愁河西庚癸始一
翼謀覆地積與丘山高梯航復鱗次借詞攻守具厲聲喝
猶未呈散更一朝多財懼爲累嗟乎九牧金粟則三韓贅

米豆以萬鼓，島間猶百二。海凍不能冰，茫茫胡沙際。怨愁
築，則有辛勤詎堪記。仍謹備榆關咫尺嚴，所畏三捉逾短
襟。七哀無乾袂，呼天請斥免。天意閔然示車脚，置勿炊初
禾。返其志，經年蘇病草。采藥陟巖邃，豈無筇竹枝。心焉別
懷惴，君言提我耳。濯月冷肝肺，念當幽憂生。勿甘蕭屑醉
邊烽，茲驚伏久莫定。凶僞人力學之難，那知不天廢。吾徒
焉不學，兵事中明昧。齊頃澄汶濟，蜀亦清江沔。以若壇坫
間，誰當提刀侍叛討。而服舍鬼方，方堅義設身賓幕中首。
鼠耳何視琴，傷廣陵絕殿。鮮靈光，歸苦戰。忘百年，豈繫神
皇季。今雖殲小醜，無假絕學繼行恐。千萬秋苞桑亦憂繫。

法應及與朝力挽跳波近講求樹其人燈燈續非易疇咨
參國柄敬天皇敢戲負鼎疑未羹揚湯竊憂沸仰觀經緯
繁體侵垣野佐俯聆魚鰲謹龍淵濶言議立身愧丹紫挂
眼觸興賦昔讀招隱篇反之志奚啻倏忽親王途深經醉
醺味孤懷望初古遙隱不吾憫太息名山游被髮詎爲異
沿洄脈所思茲往獨寤寐

病起書懷

始我懷京師卜日行以穀因緣小兒女疹痘相次出視其
萌芽初終喜勿藥速青陽先我去炎風變森木嚴君授手
別兒往學干祿豈不念幽居聖作臣敢伏一從車馬道無

術可藏六七里之古澗於今有佛屋親串集其間折柳効
忠告深杯適至齒齕飲詎盈腹相將前致詞王明受其福
輕車二十里一牒乘我獨野漲無端涯投竿攪種陸新晴
度蘭澧農事喧荆服百里不同鼓十里各異曲前旌涉襄
樊招屈艤千舳北渚便縱觀晚飈蕩幾覆厥明涉中州腸
痛傷所觸荒丘枕亾友馬仲良泉湧盡一哭行行大河渡沙
淺疑可陸因之遡秦晉時雨必未沃居人甫眉攢行子額
先顛旱麓連千里郵傳食舍肉望望春明門奔車肯相屬
君恩肅陛見下拜悚清穆既退何所爲懷刺頗徵迂姻盟
借鞍馬月省三千贖長途積委頓京國思休沐形神瘁一

弱惡臥擁重褥頭如戴鈞石身若蒸炎燔方書自料揀久
不辦涼燠一醫言火熾清劑療其毒一醫言薄寒微汗不
可漉最末醫者言表裏清未足大泄仍下之既乃供薄粥
渴作不能忍試嚼參如粟頃之自生津入藥以相續臟腑
所停結血色如紫玉晨朝下數升尚覺有餘畜自茲捐藥
石參麥以爲餽夕郎

胡衡

至吾里有客隨華轂下馬來診

余排闥怪煩溽牽臂落我牀何爲閉幽谷手闢六窓開猩
猩快所欲中廚具沸湯生蒿采盈束左我虛白中通身恣
一浴敲冰如屑玉割瓜如剖竹兩晝各兼夜嗽飲驚僮僕
乃知燎原火方寸蘊尤酷飲水敵方張勢可一萬斛及其

餘燭盡已之不盈掬客取橙片香令我咀芬馥試含若雞
舌舌底生飛瀑從此甘乳糜鮮食先鳧鷖以次及豚魚蛙
龜臠市鬻厥初以我病孟豆小於目迨乎始烹辭其量不
可局私奴阿口笑傳響到庖族家君聞在道羽便須削牆
腕力尚未強字成如箭鏃惟餘雙足膝酸冷行行步步必
把桃絲否卽捫版築嗟余病初作新雨誰芳躅晨夕視醫
療相緣惟我叔躡侍御音袁漢吾姻戚撥冗來數數推食良
殷勤手書毫穎禿宗伯馬時我良友肩輿頻往復每至語
縱橫照我如朝旭夕郎初至邸匹馬籠紗縠話我家門中
俯仰如洞燭應時起我病跳擲如新犢自餘止門屏傳語

示相勗吾皆以書謝徐起著頭幘嗟乎際明主百拜沉頭
惡何以圖報稱宦情徒隴蜀胡然牛驥中熟官同錄錄
江與五湖微尚吾昔夙行當掛進賢綸竿倚湘淥朝游或
藉卉暮歸仍枕麴豈必勒燕然身手博瘴瘴

聞訃乞歸不得待命蔚州潦倒歲暮和淚擬古不自
知筆墨之所至也

皇天生白日物物荷昭融孤兒處其一何乃遘奇窮今年
奪我怙萬里兒弗躬叫叫聞哭聲孤兒耳非聾條條識歸
路孤兒目非矇胡爲滯異域日夜號天風

二

念歸豈今日七月兒上書吾翁憶兒子字字達宸居皇心
重牧圉不惜至情疎坐使肝脾裂莫慰倚門閭想見一息
存識田千鬱紆嗚呼暴雷震狗鼠不願餘

三

連雞飛不得況乃雙龍垂吾翁有絕筆孤兒慟無涯三字
不可解一字兒所懷君子念結髮及此真老偕治命當祇
承山原况幽佳歲時未逢吉百憂何由排

四

良辰待合璧重慟母夫人十四蚤見背今踰三十春孤兒
亦將老嬌愛億如新嬌子恒不孝兒罪難重陳今生懼有

盡定業墮來因傷哉孤兒行永世垂戮民

五

粵稽大易象父母並嚴尊孤兒獨何幸仰事皆慈恩墮地迄今日慈深不可言孤兒不能報悠悠望後昆何以報本源海門遡崑崙何以報本根奕葉蕃耳孫

六

崑崙鬱嵯峨積石青琅玕河源走中國到海無安瀾至今產諸■水草性兇殘孤兒非介子焉得斬樓蘭所以羈絕塞不能奉親歡所以遭百罹不能憑玉棺

七

如簧有底極時命與之遭殺人既三至慈母爲之逃伊誰
似吾翁神襟泊天高鐵輪旋頂上定慧了不撓檻車詣請
室如鷗戲海濤猛虎著金鈴終焉能解縲

八

異鄉胡不歸王事須踐更守株兀然待古路無身橫我欲
縮厚地兩戒不可并我欲叫高天九關寂無聲方知古來
語難將今世評一夫徒向隅滿堂誰肯驚

九

厥初命筮日感神期至誠及乎再三瀆神已厭謫謫孤兒
苦無告焉得効金縢再疏呼九關異命卜申衛帝德荷包

荒馮河不假帆孤兒敬受命顛倒著征衫

七言古體 長短句附

牛頭山寺雨中

雨裏看山上牛頭荒藜峭崿巉高丘
蹢躅磴道行夷猶
錯跌滑難畱縈回屈曲叢林幽
逆風送冷來颼颼長廊
廣殿俯平疇短禾深綠侵人眸
僧耆肅客紛悽悽撞鐘打
鼓高雲愁飛泉下雷如鳴簌古瓦剝落苔蘚流穿土作穴
環以楸蘿薜引蔓手可拈火雲六月宜披裘洞陰垂厭不
能遇起瞻雨脚苦未收杳藹慘淡空山秋地肺冥濛不可
求陸海信作蓬瀛洲安得矯翼臨風游高尋不死恣冥搜

莫叱狐狸逐鴈鳩可憐暴巫方未休

五丁峽

杜鵑爲帝鼈爲相蜀國傳疑非一秋天生五丁會有用鑿
山豈爲貪金牛危途屈曲通諸夏稚水洗石聲潼流神工
鬼斧不可詰黷慘黑壁雷風愁憚若九閭之虎豹窈若洞
穴之龍蚪愚公之孫不能徙炎帝之女啣而憂鬱盤雲棧
未云險恫疑虛喝茲其尤秦人取蜀復幾日萬古枉著張
儀樓永爲奸雄恣割據寸土妄欲興權謀劉氏兒材信庸
短桓家妾貌何嬌羞乃知城峻衝生氣未必岷巖含帝丘
蒿中之雉室中鼠擲海不足憂其頭可憐唐家一隻箭墮

落萬頃身行收何獨三刀與二矢解夢占天來益州

到蜀使還以詩代書

我生飄然嗟泛梗時命驅牽不自省靜來思動動思靜有
如轆轤帶孤縋汲者指指無停影昨歲除官慕其冷虎林
住山水龍井今年之官亦俄頃豈知被檄走汶嶺萬里之
行厭驅騁我欲辭之不得請家畱越絕非吾境強笑出門
喉欲哽大父七十娛老景顧我遠去殊路晴兒生尙不辨
項領對之肝裂腸恹恹水行一句乘舩艤陸行兩月薦轡
整果吾之腹饑索餅酌以流泉操柳瘻白日欲寢夜中耿
鬼嘯猿啼短宵永雄劍悲歌燭恒秉楚調越吟雜淒警寄

言家人莫延頸忍泪裁書漬毛穎

龍雨圖書

炎帝祝融相偶鍛飛廉屏翳營爐炭陽烏墮落火熨燿燭
龍吐耀旦復旦吁嗟富媼頭額爛下燎深谷上高岸赤燥
怒神恣凌亂捉擲萬物充薪爨空弓落飛不以彈百車委
羽聊一燎盡纖毛羣截萬段蚍蜉蟻子無可追流金焦土
何足惋礪礪爍石若礪礪碑礪礪五色矸補天不漏東
南半焚林赭木猶所玩灰揚弱枝夷強幹平原廣澤等離
瞋封狐螭蛇奉頭竄雄虺九首走流汗江妃漢女愁曼曼
楚人虞漦不虞早有甕不知漢陰灌眼看黃稻無白粲汰

終隕血不可斷一龍矯矯天際觀尾搖北戒首南漢堯時
赤松從捩肝翻然下擊仰鳴鶴寒生颼颼雨爛熳然雲驟
與燒風散清朝雷鼓鳴至肝神犁縮胸女媛悞倒提執屬
疾以攬南條遭之不敢館江沙晶晶水渙渙平嘯渺渺皆
盈畔穰穰穀熟不可算矇竊作歌補圖讚

黃梅雨歌

同年胡子瀨居武學齋中鑿垣得池作五字詩有
曰一事干天公黃梅五月水余過輒哦之既而一
雨五日快哉歌以戲子瀨當相就豪飲使酒如此
池

嗟嗟皇天不言百靈無主白日憤憤朝開門夜閉戶誰復
知四時之序風雨寒暑雖有雷公不如蛙鼓屏翳枯飛涕
唾無所下桃花三月自迎梅五月不送胡爲哉石頭城中
一片草腰鎌剪出池一杯蒿茸茸池裏圻有吳一儂此爰
宅儒其冠儒其宮先生雌弟子雄一毛錐受五石弓朝看
鍾陵頭釀烟無力已復收暮測秦淮底新潮不上一稊米
怒呼東海君爾爲百谷長奉職胡不勤衆流到爾一口吸
不以餘瀝津他甌天公忌霖雨卷舌無云云大神大身聚
爾海雨耳屎溺塞不聞去三日不雨倒披鱗甲以爾焚仰
叶箕與畢爾罪不可以殫述煌煌列星高焉與爾爲匹哆

口附爾何詭密無情有時暴風雨緩急賴爾還無術却後
五日不雨隕爾九地不復出龍公汰龍子幾死下浪能見
爾敖客然敢敖旱車疾於駛黑雲堆堆屋角閣急雨振瓦
中宵作燃燈照室漏林箔無有頭數無雨脚如以大海盛
一杓擲起空中驟翻落滿地江淮與河洛呼聲震吼填城
郭帝開九閭咨爾下民胡擾擾而驚紫宸雷公忿怒最瘦
欲死頭觸帝座訴說不止地上有黃吻少年不知其誰之
子嚼舌出血昂首噴帝奴風婢雨叱咤孔厲門有五百弟
子員雄雞弁首猥皮裙吹劍一呌氣若雲竊后有一羿九
目爲之盲今此弟子衆吾恐有逢蒙陽侯挾尺璧蛟龍暴

其顛吾恐此弟子其中有澹臺嬾龍乏一牛跡水驅走流
汗真可哀帝曰咄汝無言虎豹安在絕汝蹻爲龍游說死
不原有詔小臣淳爾有一寸丹久陰不雨雨溺職以爾誠
意能仰干龍雨不如天雨好爲爾泛灑揚其瀾皇皇天帝
大神聖向者左右徒欺謾浮雲八萬里俯視茫無端叩聞
只取一夫力可使性命無不安深夜徐徐睡初著血冷蛟
蟻聲不惡一觴穩對池水清須我與子吟還酌

昨夜吟

乙卯六月十六日雨後作

昨夜羣工醉真幸天帝庭前爭擲采仙人手攬蓬萊根唱
籌滿斛量東海東海波臣迄未收明珠顛顛惜教流不知

海若緣何事輪盡十洲盈九州銀河七月秋來蚤前代牛
郎今世老玉女親攜百束絲乞與家家放淫潦天上今蠶
地上實鵲毛已殿鴛鴦匹侍兒無語下寒梭青眼浪浪啼
未畢天涯此夕若爲情孤枕捏捏坐復行半魘銓光猶古
道夢來時作壞垣聲

至都下將入廣寧門來馭仲馬上相識倉皇敘別東
之淮揚

牛角馬蹄無策算長安市兒厲聲喚何意風塵不寐入我
心若水爲君泮可憐昔者周旋年溫泉炭谷君之館以鍼
刺酥相入深肯擬晨鳥一啼散今來日月復何許口不敢

言君仰看久於懷人有真味脈脈執手無驚惋誰知此面
爭須臾青絲一尺能遮斷吁嗟造物欲見巧使我愁喜適
居半正復蕭條暮色來子轡豈能爲我按未向兩鬢都白
東不是故人書可追

陸君啓宅讀新詩有贈

陸子久次肯爲郎首卽未白髭不長刑曹把書目三仄退
省成案猶百行風沙寢地屋月好爾時幽獨爲文章春來
見少八九作以我好字取閱忙新泉沁齒豁谷淨古紙拂
面須眉香愛之欲和轉放廢筆墨斥遠親豆觴嗟余合龕
豈名飲不者瓦石舍吾腸陸子於茲更河漢拔劍一人成

酒區謂余倒載子安枕正爾醋甕走欲嘗當知一句一咽
絕不與飲趣爭鋒芒終被摯虞難叔廣酒無可記君滿囊
所期於子真造極莫逐世兒尊宋唐

顏婺行爲唐天中母氏作

長檠達夜烘銀乳清晝鉤簾又低舞少年祇解促觴行長
老分明話淒楚聞說韶華七十春當時不意白頭人顏家
嬌女深自惜名父佳兒方請姻十年暗壁爲新婦猶怯晨
朝上堂步纔占莞簟慰爲星遽忍藁砧溘先露可憐翁歿
未經年不及夫身問墓田青山到處繁師說赤手何人乞
母錢方營馬鬣規爲一小郎介婦俄成四地上悠悠盡掉

頭泉中咄咄何連臂酸來破鼻不敢哀尚愁風雨爲巢災
嫁時只省牽黃犬孀後空今羨綠苔官司未了催租虎收
盡薄田不盈庾由來一髮動傷心甘以金刀謀禦侮老人
至性亦頗奇咀嚼衆苦如蜜脾直言憔悴將無底那識榮
華別有時天家詔下旌安節此母升聞操水雪莫輕一片
歲寒心百世其能史官說何況司農子大夫來從五馬會
新除却緣奉使辭交戰暫得懷歸拜倚廬孫雛不耐相鬧
繞王母歡言阿爺小熨斗旁邊看作襦而今銀荔垂腰儂
辦取誰何作酒材坐稠難得有深杯許我洞夜明月夜直
乘一葉自東來

送阮集之使閩

行人守官向路旁馬箠欲與腰帶忘風江渡船兩岸火童子呼夜麤饑腸阮生銓除來幾日一節直取閩海長程程食蔗到幽興青壁冷滑堆雪洋吾曹戟枝熱沙裏臥念子去生蒼涼却愁馬溝汗齊魯吻燥不待荔子漿燕姬十四嬌索乳掩露只尋紅麝香安知阮生不倒見忽復憶此如去鄉博棊楸枰夢恒理夢或吾汝仍頡頏前期後面卽未得一日得之何以償

薊門行

薊門雲日青且黃薊門寒風千里長長楊短草各奮迅棗

栗無葉抱枝嬾車行一步有前却怨此廣陌無禁藏驚沙
浙浙張地底五里白露十里蒼披帷忽覩健兒過意色倖
惡曼胡裝青絲轡頭不在手左脇劍室右矢房卷旗橐鼓
謹卽路慎莫與若爭冠裳東來老翁不放挺舍卒步恐相
格當啾啾黃雀穿耳過啄棄黍粒辭道旁雄邊生人有如
此此去朔幕一宿糧高皇定鼎江海會文帝弱之都朔方
因山截海限飛鳥門戶雖嚴惟堵牆終資天性給憤悍虜
粉小醜如怒螳男兒三十仕爲郎汗漫何期在帝鄉放驢
取樵亦自喜駕此車輕仍馬良亭虛候吏欲我慰忽念鼎
鼎日月忙髮垂兩肩事羈旅衣襖十年恒處囊方州有九

游其八縱觀古昔都邑場周秦以來置勿道長裏險固先
虞唐嗟乎文帝制區域獨以元氣爲封疆脫畧萬古小謨
烈抗首披衣臨八荒長陵紫翠坐萬變度德何止億載昌
弓刀小兒取吾語爾須作健莫作殃

苦熱行

以題爲韻

春風累月敲蓬戶欲行不行需夏五丹楯作火槐作烟河
南曬麥江南雨清晨驅車直至暮力疲不敢憩亭午誰言
解慍理虞絃動卽驚沙滿焦府豆田瓜畛墜可憐井盞不
共轆轤語安得苗竹青松間冷淘自起拈匙箸

遙林蒼蒼眼精絕火輪催燒天地血烏斯兩翅不得收坐
犬口吐三寸舌可憐居人語咄囁欲前不前道旁轍浮雲
展地十畝陰我行入陰忽如掣筋骨爲薪汗爲煮俄頃顛
毛煉成雪安得破屋架飛泉盤石澣水雙足迭

三

紅亭刺促車徒并獨止不得非貪程我欲暮雨朝復晴日
輪當午陰雲生纖塵不動鞍馬清夕有皓月臨軒楹洗眼
露坐蟲無聲更長睡美星斗橫松風竹雪夾兩道習習却
灑肌骨輕吁嗟此志卽遠志慎勿浪語征夫儉

楊文弱先生集卷之五十四終

曾孫

繼授梓

楊文弱先生集卷之五十五

明 武陵楊嗣昌文弱著

農基

山梓

孤兒山松同輯

孫 農耆 同啟

山梯

農止

詩

五言

庚戌都門作

短榻支窗戶秋佳夜不局失眠聽小雨却坐山疎星客漏

疑無曙歸懷怨未醒徒勞覓夢遠雲白與山青

首夏園居

綠蓋童童柳青青
錢點荷鳥飛翎
互扇花長葉相應
急雨移牀看微風
引棹歌野棲無一事
衫履共修蘿

二

枕簟巾香穩圖書永口娛鼻鼾驚夢破眼語潤腸枯病蝶
拋微粉遲花怒短鬚偶聽禽詠響朝聞失吳趨

三

北戶疏田陌南山壓水湄
林香思醉日魚動惜烹時
過客顯分榻鄰翁亦品碁
古來河朔飲隨意不相師

送人之廣陵

淮海名都會關津吏隱曹爾家傳楚壁薄宦買吳舸子夜
空城拆秋風滿月濤離愁逐江遠良信與鴻毛

黃河守風

三洲不可望一蒿詎能航人夢搖孤枕臨流刷短裳且嗟
河有損莫問我無糧倘卜西南利君看破渺茫

旱

望越江淮慘啼聞井里哀黍苗春總盡蝗族午仍來裂石
泉根死燒林蠹節閒還悲召巫鬼紛不爲田災

峽石山行

未諳蒼峽裏長日在氤氲遠岫頻移翠寒阿每續雲路分
疎石過溪靜獨流聞物色饑征馬黃禾自身耘

華嶽

突兀俄當眼窮搜甫盡神洞曾毛女宅山卽巨壘身大地
從分絡微風豈任輪也知攀絕頂詩復恨驚人

南峯

斗絕惟南華靈泉養碧苔仰空無雁落俯壑有蛟來地肺
羣峯簇天河一箭催遲留待仙子龍駕或飛迴

西峯

顯色臨馳路危標最谷西一峯青齒替千淵白虹霓石罅

猿生子松髯鼠命妻獨行逢道者珠露解囊攜

兼程

不知鄉縣遠日日數程兼殊俗看妝髻名程在酒帘盤餐
隨地儉晴雨問農占漸覺歸蒐懶幽眠入夜添

過竹居老人林亭

非緣相識慣看竹偶過門委巷憐雲色團焦見水痕地貧
家不釀身老舌猶存爲客躊躇久呼兒返釣輪

曉發汜洲却寄史元亮

漁炊雜江烟濛濛進曉船櫓聲寒自切隄鼓急初傳潦岸
隣荆柵空洲弟禍田此行雖見戴餘興不能旋

懷龍君御先生澗園

屬聞陶令宅更築庾公樓影靜琴絃夜聲傳展齒幽美人
成道侶童子和於謳莫向山陰去從茲鏡裏游

除夕得家大人書

昨夜寒燈色今知似印泥人來一日晚書是隔年題短燭
須如畫深杯許到齊兒童說鞍馬忘却畫雄雞

送鄭紫苑先生之印江令家君先生門人也時按部
黔中末故及之

一日一春情遙遙見此行詩兼蠻語疏花發瘴煙明墨氣
鬚分綬江名印與清嘲師無典記腰折爲門生

同金仲栗德山曉行

山眠佳且起莫易此秋容僧性那如竹江聲但學松輕橈
將十里疎磬尚孤峯逋客堯時意看來亦許從

朝夜長安街緩步成詩

強枕終無寐行來稍自寬千門涵月靜一炬曳星殘輦道
深遙想鐘聲慰仰看攬衣雙袖窄昨日到長安

竹

爲郎無耶舍復借故人居此地十竿竹吾翁一束書酒邊
生雪想眠裏覺風餘亦有經過客淹留自爲渠

送陸君啓之粵西

蚤知分手日杳杳畏愁生共子如能說應非別後情身防
湘水照官角嶺雲行桂樹秋來好無淹苦竹城

二

似緣君姓陸直作粵中行隔嶺荔娘小近徼椰汁清文應
師進士帳不滿諸生將子無飽苦餘閒一樹鶯

三

生來強足力天與副遙情桂海志猶懸羅池碑不誠輕思
浮鴨背愁欲度茵筓未有因緣在令君喜且驚

四

與君成再別別味迥疑更今日三生侶前時四海兄蒼梧

維楚近斑竹有虞生詩莫操蠻語蕭然自怨聲

馬仲良且軒看竹

披帷在竹房種卽上番長露養栽前翠風嘶淪後香高情
元詩癖失意敢辭狂三十爲選客知君何所望

贈蕭宅明先生時長君星移倉曹

通家爭暮致真不異諸郎解發長安笑須分於越裝只無
魚腹勸終憶鴨頭香折屐今稍喜蠶鹽博太倉

晚悼裏湖示人城者

將尋暮湖碧敢怕夕陽蒸急艣認橋慢薄帷依樹層入煙
無岸水先月亂星燈清興相看罷君歸應未應

湖南夜歸

一笠釣車前湖南晚去妍塔紅將落日林白小橫煙帶溼
嵐邊鳥無喧露裏蟬淺涼堪破夜槌磬學僧眠

過黃貞父先生寓林

遙知寓此峯却望亂青濃無徑雨寒竹半樓雲拂松藥研
天鼠用書養石魚封靜得如如理君看燕擾龍

曉渡采石微聞大行消息

合眼守清夜側身傷亂秋風潮能晚渡天地肯安流細草
知銜石微塵敢閤漚攻中萬端血收滴且深憂

聞雁

汝夜孤何適於秋慘未分蒼黃宜勿下哀痛果微聞烽莫
此時騎邊能何處軍金縢不主會恩債羽毛羣

八月十五夜月

十年今夜月慣作客身輕影共輝將散心如鬼未生氣融
渾野分吹細脈河聲忽愴高旻馭寧追姊其兄

十六夜月

纖纖爭海印隱隱急雲圍日夜俄能爾人天尚不遠藥無
將免謾弓或傍龍飛清露風禁得胡爲暗溼衣

十七夜月

已欲虧形氣偏能滿性情竹相深冷瘦松愈刺精英水觀

蚤知嘿山程雁不爭銀河教落盡無練與空城

長安驛寄楊大友

輟眠聽鏡石今省是春流鹿食山田夜鮑吹浦市秋暗催
孤驛瀾輕選隔湖舟盡作還家笑君哀此意不

岳陽舟至臨江驛

春遲驅馬地相顧已茫茫樹貌遙歸柁蘆心俯受檣墨山
分路白青草到波黃直向沅湘去臨深意不忘

蘭江

淨碧琉璃水秋煙嫩勿加美人動羅幌雙照繡菱花馬認
平沙棧蜂歸驛樹衙尋常渡來去幽醉省誰家

夜發

客眠難候熟中夢忽前途銳勿迎朝氣吾潛誠僕夫路時
傍水見林下借煙無獨戶誰爲啓驚聞鳥一呼

公安

生事苦無度茲鄉焉取廉種魚人范蠡垂柳戶陶潛歲卜
沉湘稻江通巫蜀鹽秋如有痕著清切畏茅簷

過雨

江喧寒枕寤雨滲夜蓬餘失笑青油幕方驅下澤車不歸
雲更逸將泄水還瀦旱後霖如許能無歲總虛

夜春

寒杵爾何切旅行朝不供方知野田米量腹乃爲春晦昧
殷鄰樹忽微浮遠鐘古人師其友時節寤言逢

庫柏

江南烏柏好尺許笑宜城不見繁霜落唯驚朱草生失添
茅屋瘦空逼野塘清靜憶平山久如聞索索聲

武陵平山
多此樹

行柳

漢南馳道柳煙徑接長安束髮秋風裏騎驢十四看弱憐
思婦恨衰共禿翁寒田舍青青有惟依細犢欄

襄陽

岷南歌未絕漢北爾重陳坐作齊鉦鼓誅茅種蒜人國風

篇逸楚井地法先秦願恨山濤子荒亾用晉民

穀城

嘉丹蒲坂馬嶷華眼中生我更叅玄嶽囊衣過穀城以峯
垂接遠將霧習升輕浩劫無多拜吾師詎水聲

黃峪

過眼名黃峪入圖看翠盤山王千眷屬水帝一波濶動仙
塵中細虛空界外寬人生勿寥廓多謝遠游冠

界山

驛了非人境山唯界客塵地切三戶楚天棧五丁秦始有
澗春雪不期巖貯春花香若蟲語虛已受清眞

答馬仲良

仲良言十六年前曾作崇游

興與纘相奪終多徇所安以吾研較晚知子再斯難夢或
煙中語閒須世外看若爲劉伯壽生老在封巒

夷望山

乙丑冬日舟游攜水經注證沅水所經地爲
之詠得十一詩

按桑欽水經沅水又東北過臨沅縣南自此以下
始爲今桃源武陵境酈道元注曰臨沅縣與沅南
縣分水沅南縣西有夷望山孤竦中流浮嶮四絕
昔有蠻民避寇居之故謂夷望也今水心巖是韓
退之詩江作青羅帶山爲碧玉簪可移以目此山
又曰南有夷望溪水南出重山遠注沅今漁綱溪

乃夷聖之訛也

每愛昌黎語青羅綰碧簪所矜吾土美遙獲古人心四壁
信孤影五溪懷衆音冬春兩攜策稍不昧高深

關下山

注曰沅水又東得關下山今仙人溪西有脚底痕
者羣巒峭嶠鎖鑰衆流目之關下良是余經蜀道
觀巫山十二峯煙草娖媚此有其態焉又曰東帶
關溪瀉注沅瀆卽仙人溪是

衆峯相倚媚煙草惑巫山每向桃源說如經蜀道間仙家
藏定密水意折從關妙盡支川理蟲魚注可刪

白壁灣

注曰沅水又東歷臨沅縣西爲明月池白壁灣灣狀半月清潭鏡徹上則風簫空傳下則泉響不斷行者莫不擁櫂嬉游徘徊愛玩今穿石是也石穿正如半月下有澄潭疑卽明月池後漢書馬援傳援征五溪蠻進營壺頭賊乘高守隘水疾船不得上會暑甚士卒多疫死援亦中病遂困乃穿岸爲室以避炎氣賊每升險鼓譟援輒曳足以觀之左右哀其壯意莫不爲之流涕今此石自然嵌空斜倚不類鑿成漁仙諸石室則縱廣方丈位置諸峯

眞人力所造壺頭距窅石西百里在沅陵東百三十里清浪雷淵二灘之間水疾不可上卽其地也此山疑漢史穿鑿豈無痕煙水營茲窟華夷限若門笛寒飛鳥路燈遠釣魚村賴作嬉游思篙師已悵寬

三石澗

注曰沅水又東歷三石澗鼎足均峙秀若削成其側茂竹便娟致可玩也今漁仙寺側水巖是巖石參差八九而自上流望之鼎立稱尊適可三足中皆有澗隔之餘小石四五同於兒孫側地至今饒竹又一異也漁仙寺古巖頭招提其後聖珠洞有

宋人紀游題壁

號石宜爲萬稱尊適可三中仍瀉寒澗名久蝕精藍伏谷
虎晨去隔沙漁夜談霜林與霞壁襯取夕陽酣

綠蘿山

注曰沅水又東帶綠蘿山顏巖臨水懸蘿釣渚漁
詠幽谷浮響若鍾今在桃源縣西十里綠蘿名字
不昧得此證上下諸山表其故目無疑也

一生看不足疑此弱煙凝靜覺娥輕斂虛惟影自憑飛濤
霑雁字寒葉點魚鱗坐撥孤琴冷清音寫未能

平山

注曰沅水又東逕平山西南臨沅水寒松上蔭清
泉下注棲託者不能自絕於其側今河汭山是也
自綠蘿以下無西南兩面臨水之山唯此山方域
無爽而幽泉滿腹四溢清冷尤爲脗合舊志訛此
爲武山按水經注沅陵縣西有武溪源出武山與
酉陽分山今酉陽安在辰州志武山在瀘溪縣西
一百八十里去此蓋將千里矣梁高僧傳曰釋慧
元河北人晉太元初於武陵平山立寺有二十餘
僧食蔬幽遁永絕人途以太元十四年卒卒後有
人入武當山見之神色甚暢寄語寺僧勿使寺業

有廢自是寺內常聞空中應時有磬聲依而集衆
未嘗差失沙門竺慧直居之精苦有戒節後絕粒
唯餌松柏因登山蟬蛻焉朗州圖經曰沙門慧原
義陽人也少以弓弩爲業至武陵山中射一羣鹿
將死能言曰吾先身只殺汝汝今併殺我母子旣
是緣對應爲汝死復向言曰吾尋當成佛也汝可
行善生生代代勿復結冤惠原卽悟前緣遂落髮
於鹿死之處而置伽藍名耆闍窟山寺王融別傳
言原死後十年有人於武當山下見之慧元惠原
蓋一人兩傳圖經互盡一事耳今河湫山左谷中

遺柱礎四大如車輪云耆闍寺基有小菴故號耆
闍此平山住證何冒武山爲也

信矣堪棲託高真蹟可尋泉仍渫山井磬未隱空林魚鳥
供人足田廬隔世深能來漢陰客吾與息機心

臨沅縣

注曰沅水又東逕臨沅縣南臨沅水因以爲名王
莽更之監沅縣也今武陵縣是南臨沅水無改舊
疆又曰縣南有晉徵士漢壽詩龔玄之墓銘太元
中車武子立今不知墓所在詩一本作人按晉書
本傳玄之字道玄武陵漢壽人父登歷長沙相弟

子元嘉亦有德操高尚不仕宋書龔祈傳祈字孟道武陵漢壽人從祖玄之父黎民並不應徵辟祈時或賦詩言不及世事然則龔氏世有隱德兼擅詩名今本漢壽詩一作人疑當作漢壽詩人未可知也又曰縣治武陵郡下本楚之黔中郡矣秦昭襄王二十七年使司馬錯以隴蜀軍攻楚割漢北與秦至三十年又取楚巫黔及江南地以爲黔中郡漢高祖二年割黔中故治爲武陵郡王莽更之建平郡也按前漢書地理志武陵郡高祖置莽曰建平屬荊州後漢郡國志云秦昭王置名黔中

郡高帝五年更名與酈注頗應晉書潘京對太守
趙厥問言酈郡本名義陵在辰陽縣界與夷相接
數爲所攻光武時移東出遂得全完其議易號傳
曰止戈爲武詩稱高平曰陵於是名焉此未知所
據詳史記高祖功臣侯表有義陵國以長沙柱國
侯千五百戶前漢志武陵郡有義陵縣酈梁山序
水所出西入沅水經注序溪水出酈梁山在辰陽
縣上流蔡沉禹貢傳辰水出辰陽縣三山谷今辰
州辰溪縣敘水出義陵縣酈梁山今辰州溆浦縣
括地志黔州故城在辰州沅陵縣西一統志沅州

古黔中郡地。激浦古義陵縣地。有激溪山。激水所出。然則京言義陵本在辰陽縣界不誣也。又曰南對沅南縣。後漢建武中所置也。縣在沅水之陰。因以沅南爲名。縣治故城。昔馬援討臨鄉所築也。按馬援傳。軍至臨鄉。遇賊攻縣。援迎擊破之。注引東觀記云。二月到武陵臨縣也。考前後漢志不得臨縣所在。惟沅南縣以建武二十六年置。光武本紀建武二十四年秋七月。武陵蠻寇臨沅。遣謁者李嵩中太守馬成討寇。不尅。於是伏波將軍馬援率四將軍討之。二十五年。援等破武陵蠻於臨沅。

是則東觀記臨沅之云本指臨沅援傳遇賊攻縣
亦卽臨沅縣耳如云別有臨鄉先爲師次之所却
後築城立縣自當不遠臨沅而今郡志南城在德
山上較爲近之乃志謂此城爲宋宣撫司韓宣所
築余讀劉禹錫登司馬錯古城詩將軍將秦師西
南奠遐服故壘清江上蒼煙晦喬木又意此城爲
司馬錯城也郡志錯城在府西尋其故基絕無影
響豈此一城者始基於錯增修於援與宣而後人
名之不一其說歟考宋理宗紀景定四年呂文德
築浚鄂州常澧城池訖事詔獎之守臣韓宣轉迺

郡宣撫司咸淳四年樞密院言韓宣城渝嘉開達
常武諸州有勞意宣所城者廣不應獨以德山當
之也

萬里牂牁水春城幾其臨劃沙煙作帶吹岸雪爲音花開
秦年曙烽纏漢塞陰不知招隱地荒草尙堪尋

枉人山

注曰沅水又東歷小灣謂之枉渚渚東里許便得
枉人山西帶循溪一百餘里茂竹便娟披溪蔭渚
長川逕引遠注於沅枉山今德山小灣今釣灣是
也溪港中通八九十里山多美竹於今無爽云屈

原九章朝發枉渚兮夕宿辰陽本原所游集杜光
庭福地記德山在朗州武陵縣善卷先生居古名
枉山沙門文會撰先和尚碑云山則堯時枉先生
避榮之所也相傳小灣爲善卷釣灣山左江南村
亦名曰善卷村不知所自始意其來遠矣

溪山良自昔復此足幽篁網戶畱遷客僧寮割讓王掠沙
晴雪過觸石古雲香愿結清娛地生生墮勿忘

漸水一名澹水

注曰沅水又東入龍陽縣有澹水出漢壽縣西楊
山南流東折逕其縣南縣治索城卽索縣之故城

也漢順帝陽嘉中改從今名關駟以爲興水所出
東入沅而是水又東歷諸湖方南注沅亦曰漸水
也水所入之處謂之鼎口按前漢志武陵郡有縣
十三首曰索注曰漸水東入沅後漢志漢壽故索
陽嘉三年更名刺史治沅約宋書荊州刺史漢治
武陵漢壽魏晉治江陵劉禹錫漢壽城春望詩自
注古荊州刺史治亭下有子胥廟兼楚王古墳蔡
沉禹貢傳沅水出蜀郡由牂牁郡東北入武陵郡
北至長沙入洞庭行二千五百三十里漸水出武
陵郡索縣東流入沅今武陵縣東北四十里有崕

隴城古漢壽縣城也其地仍名漢壽鄉城塹猶在
縣西陽山則今梁山是也所出之水則梁山西麓
二十里靈泉寺側石罅中水轟殷不絕爲溪河經
崆隴城下東北流歷諸湖而出於今龍陽縣之東
北百二十里爲鼎口水出焉亦曰鼎港古之人不
吾欺矣酈注澹漸二名闕駟復云興水以漢志蔡
傳考之當作漸爲正噫自吾辯此水而梁山爲古
楊山崆隴爲古漢壽武陵爲古荊州與之俱著洪
覺範詩雲山久乾沒賴此佳句贖豈獨爲楊山作
也

沅泉寒烈石誰遣故名湮地秘楊山奧城荒漢壽春辨餘
稽古力閒作問津人去入江南夢朝宗道所遵

汜洲

注曰沅水又東歷龍陽縣之汜洲洲長二十里吳
丹陽太守李衡植柑於其上臨死勅其子曰吾洲
里有木奴千頭不責衣食歲絹千疋本史公曰江
陵千樹橘可當封君此之謂矣吳末衡相成歲絹
千疋今洲上猶有陳根餘枿蓋其遺也按裴松之
注三國志引襄陽記衡字叔平本襄陽卒家子漢
末入吳爲丹陽太守衡每欲治家妻習氏不聽後

密遣客十人於武陵龍陽汜洲上作宅種柑橘于
株晉咸康中其宅上枯樹猶在今龍陽有大小汎
洲起縣西二十五里盡武陵縣東三十里與白沙
分岸長五十餘里矣司馬相如上林賦黃甘橙棣
張揖注棣小橘也出武陵唐志朗州武陵郡下土
貢甘宋王拯燕翼貽謀錄承平時溫州鼎州廣州
皆貢柑然則武陵柑橘相傳久遠間歲游行市兒
取一柑餉客曰絹柑也擘之香霧芬美有異常柑
因觸絹字之義曰歲上一足絹其是物哉千載而
下誰遣市傭沿襲斯語勿輕木奴覓覓有知也

野水寒無外柑名絹不亾寧期彼傭語相助我思長宦莫
資三徑生當植衆香漫勞田舍女解事學襄陽

龍陽縣

汪曰沅水又東逕龍陽縣北城側沅水沅水又東
合壽溪內通大溪口有木連理根各一岸而凌空
交合其上承諸湖下注沅水按前後漢志武陵郡
無龍陽縣晉志始有龍陽而不著何代置之流約
宋書言吳立龍陽改漢壽曰吳壽龍陽亦漢壽地
也而何名龍陽我知之矣符瑞志言權赤烏十一
年黃龍二見武陵吳壽光色炫耀詳考是年龍見

雲陽已復見漢壽孫氏以爲瑞應改漢曰吳更立
一縣龍見其陽由是得名復何疑乎而郡邑志以
爲水勢如龍縣在水南故名夫山南曰陽水北曰
陽古人豈昧是哉酈注水經縣北城側沅水今猶
昔也惟不得壽溪與大溪口之所在今武陵縣西
南有大溪口上不承湖南齊志武陵白沙戎有連
理櫬木根不岐岸或本非酈所指隋志龍陽有白
沓湖今諸湖無復故目蓋莫得而詳之矣

僦船牽岸住燈火向城孤井邑黃龍置圖經白沓湖隔溪
連理渡殘夜竹枝無不測巴丘水皇皇衆所趨

登城作

春無閉戶理病簡出門心遶屋因行藥登城暫快吟新樓
樓半堞疎樹語分禽跬步悠然遠微和扇已深

光文樓次韻四首爲丘毛伯作

高深無限思人外一登樓旭日生軒麗寒星在戶流酒杯
空莫問詩卷散慵收坐食神仙字何勞夢十洲

二

百間容易築千卷購難成往復看隨架週遭擁若城兒孫
同所好師友自相拜日月憑南北誰能測至精

三

敢擬樓居好鵲巢亦苟然曾傲使者節偶坐廣文壇匡續
尤多異麻姑不限仙肯容叅硯北塵鞅卽同捐

四

不才慚授簡巨手怯如椽墨許於謳副香爲麗正然異同
齊物化動靜體中玄謝傳無多傲王褒擬頌賢

七言近體

山松曰先人此體詩亡者十之七八選者不無遺憾

蜀道偶成

遠樹行過又遠峯回看鳥道入還封得知天寶詩供眼可
畫嘉陵墨吐曾連嶂暗容拖楚雨夾江晴勢落吳淞蜀鵲
老却非歸日胡雁新翔定許從

壽胡太守母張安人

桂酒盛來鸚鵡螺，楚天秋月動層波。
時聞嘯虎知王母，更倚明蟾見素娥。
庭沼夜深迴鵲影，洞花春老有蟠柯。
使君獻壽情無極，蒼珮聲中起舞多。

二

八座夫人常鍊形，東征隨子駕雲輶。
紅顏自粲雙魚洗，紫氣常縈五馬庭。
風起郎當筵上袖，晝傳清晏閣邊鈴。
漢家已飲徵黃霸，更乞宣文與授經。

同李長叔袁小修飲江中散宅

桃花遶屋勝蓬蒿，未得仙成也自豪。
緩押新詩消蠟燭，爭

傳豔曲送春膠山深漏鼓聽全暗水激魚梁夜獨號興發
一時狂與酒不曾燕市讓荆高

漫興

懶入王途自却回莫將牽向古人猜慵依鼓澤選栽柳恥
學孤山更種梅稍喜志和多逸興漫憐康樂有餘哀因思
身隱無文語斟酌幽棲不易哉

二

莫擲楸枰與酒瓢箇中時得寄逍遙閒隨皇甫俱克隱老
竹司空不起朝春艇未行花共引秋簷無句雨相撩更於
何地能逃熱人世今看已若燒

三

僻居常苦索無朋近覺能分炭與冰萬慮不關惟野老諸
根不淨是名僧寧從片石寒山語忍被屠沽酒食徵自擬
直同安道宅阿誰清興可來乘

四

選石堆嵐構一丘闔門終日是于謳十行札好千年漚八
句詩成萬里侯炎暑夜闌爰氏笛霜寒晴下李家洲清時
度歲宜蕭屑野鳥何營有白頭

五

誰言吏隱好相兼吏道紛如自不恬且與封君誇橘柚莫

須窮鬼笑螯蹄舟潛枉渚潭潭碧山入桃源故故尖塵世
總難惟至樂獨看人向此中廉

六

詩成何必怨喃喃拔脚風塵盡此緘遺事止須親短檠許
身只合寄長鑱談鋒自溢三升酒筆陣橫開十幅帆天意
似慳人意如故教猶未脫春衫

蓴菜詩呈龍君御先生

僕去歲四五月間於武林西湖食蓴而甘以吾鄉
澤國意必有之乃取花葉辨問得其然貌今年春
於下陽坪展墓回道見洗馬堰中有此物采而食

之往求他澤則絕無有未嘗肯以告人恐分此味
昨過隱園爲龍先生說此擬持以獻且作詩將焉
早過家舅陳季主氏談及舅揀郡志示我府西北
十五里有古萆陂別無馬堰之目而西北十五里
復無古陂蓋卽其地也僕旣喜古人之不吾欺舅
氏又賞吾審辨之不謬眞一時快事秋風塵起季
薦不得專美於吳中矣昔黃魯直與坡公詩公如
端爲苦笋歸明日春衫誠可脫坡笑曰吾固不愛
微官魯直遂欲以苦笋硬差致仕今僕於先生亦
魯直之於坡公門弟子耳僕之詩不逮黃而萆之

美過於笋倘先生捧腹一笑不當爲千古佳話耶
然自今以往僕不能獨私此味但愿先生與家舅
氏共之勿廣也

修莖拔出淺深池饌得龍涎和腳絲羨盡他鄉饒蟹舍不
知吾土有蓴陂閒興張翰塵中嘆食憶顏公滑語時試把
春衫償苦筍老坡應笑失便宜

壽人六十

田家新雨狎開尊初度仍逢喜氣翻身老尙思黃犢健林
深應見紫芝繁閒撾急鼓通鄰社每著深衣迎解門六十
似君才力少休言倚杖牧雞豚

卷之三
答陳叔夜外祖

經年畫策定幽居學灌肥園十畝餘連雨暫休人抱甕早
寒誰道我脂車田無秫稻耕猶獲食有藿鹽宦已疎與報
驪歌仍未動敢煩騎馬到蝸廬

村行卽事

天雖絕朗未能清煌總無多覺有情西風鵝引新雛避軟
地牛肩野雀行園花欲開香淺洩山影正細雨斜生人過
林水一灣碧蛙暫不鳴還犬鳴

安鄉縣

大野茫茫共掌平披帷那禁不盱衡草生羊馬春依澤波

起魚龍夜潯城黃嶺可憐雲一片清歌何處月三更離腸
已覺愁能滿愁絕仍從此路行

宿松道中

青山不盡可憐青萬疊從看冷翠屏出峽野雲晴掠馬倚
峯寒石氣千星沙虛架棧敲虹影野接焚枯漲霧形那識
去家千里外方言乍費楚人聽

宿松方言與
武陵相近

戲贈胡子灝

乙卯六月癸巳甲午熱甚吳相如來說昨有兩人
飲秦淮舟中冠進賢終日見者傳以爲怪問之乃
子灝請其武學同官也因戲贈以詩

竹枝歌動棹頭難。桃葉舟過掩面看。熟客定知吹不落。冷
官何事喜須彈。深衣女葛應嫌薄。紫瀉椰杯更覺寒。最是
火雲無意緒。懶隨篙櫓到長干。

公自注子顥得詩怒甚然無以報也

姑孰道中

瘦馬纔能快軟沙。遙帆不意出林丫。江非預我稱楊子。山
却因人說謝家。曉露旋看肥稻葉。秋風猶解惜荷花。起予
對景生鄉夢。懶慢無心逗客車。

曉行績溪過輦嶺

霧重秋行在碧綃。黑松沉影對寥寥。山家稻氣香車耳。驛
路泉聲動杵腰。無復浪悲還蜀道。似成清夢續藍橋。百年

三十今猶少險地那堪數攬鑣

祁門放船

狹舫如刀羽箭遲經過貪捷復貪奇
龍聲響到不聞地峯氣青來未了時
幾纜竹梢蠻客佞一犁煙攪怪禽移
吾家不在祁山裏只爲溪行處處疑

送周無逸倉部之淮揚

檠戟雖辭納陛親度支仍載簡書新
不知古有三洲地誰是今無一飯人
北客過多唯仰醉南冠驕久莫生嗔
因君憶我東行日吹笛菰蘆遠水春

奉使三韓將歸七澤馬首宣武夕次通州悵然有作

客思瀟湘沙岸紅得歸何意轉從東雁聲虛落野航外秋色竟殘高枕中戎馬幾時將一戰輜車疇昔况三空遽條笑此無多物也學乘槎漢史風

碣石寄馮郎中

層冰未合草根齊天欲平臨北戶低雲起長山看首尾風飛遼海夢東西清笳入夜侵魚鑰皂帽經年誤馬蹄肯信故人同六翮冥冥孤淚下汙泥

榮澤寄友人

西風吹緊跳波平落日征衣萬里情古廟到門沙忽盡空城迎榜樹旋生輕雲入浪原無影遠雁低人若有聲今日

自於南戒外直看天北衆星明

榆關四詠

天末孤懷夜復明，夢餘高閣不勝情。
潮來四壁有龍氣，春盡六窻無鳥聲。
鳴鏑幾時空鼎臯，擲杯今夕可蓬瀛。
頭顱未覺吾親白，何得兒曹鏡裏生。

右曉閣

二

清瀾嚴城鎖鑰無，不將人吏誕先驅。
軍容靜裏看標帶，禮法疎時信指呼。
鯨海有光涵匣鏡，狼星無焰奪雕弧。
賓僚漸集還徐起，那得高陽羨酒徒。

右夜城

三

雨雪經春氣尚驕江南花月夢空遥千蹄踈碧惟盤蟻萬
鏃攢蒼盡撲鵬闌外每披儒者服禁中頗遣貴人貂邇來
一月眞三捷殺盡黃巾復度遼

右春郊

四

青油四壁絡刀環倉卒傳呼出漢關草覆層冰禽殺草山
圍萬火騎圍山牙旗立處巖千仞髣髴髮叢時雪一灣家世
教忠吾豈敢向來心膽近龜頑

右朔幕

答朱王樺老師

江海遥遥路險艱夢尋天際恍難攀浮雲不肯吹吳會明
月常教抱漢關魚劍捉將腸欲澀蠹書抽盡髮無環吾師

縱勿分壺隱且乞陂龍試小還

二

半窻松月寤多艱始信東山謝可攀
已有龍蛇爭起陸誰言虎豹未排關
舍人告語先脂轄使者傳宣早賜環
慚愧著書非尹喜要看真氣日邊還

五言排律

積雨郊居遣意

積氣陰城郭連霖漲戶庭大聲春古瓦狂瀾建高傾潤礎
通泉穴風簷化畢星入來從屋漏鬼出見玄冥赤腳兒癡
喜洪濤地苦經米儲誰問盎木屑且鋪廳鳥下窺厨餓魚

游入巷腥烟封樞口赤斑益蘇頭青假寐頻移榻閒行想
駕舡衣裳煙裏冷營魄夢中醒畏溼亂環堵踰泥出遠坵
霞城遙辨堞霧市隱迷汀穎粒禾初長潺湲澮不停佃奴
儀似鵲村火暗於螢下榭蕪三徑循欄遶一亭慵從巾折
角恥見酒空瓶孤嶂延雙眺長江瀉獨聽坐遣人境響清
對我池馨逐日占啼鳥過旬數落莫不憑詩撥悶輒轉思
難寧

哭龍君超先生

翼軫淪精日江湘滅浪時斯人哀運數吾道失宗師吏部
禪光寂詞林帝所追

袁石公先生中道雷何思
先生思需以是歲皆亡

傷心三楚

聖啓手一年期仰止情懷惻惻緣親理攔悲恨公埋照早嗟
我問玄暹王氏青箱學梁園白雪詞審言惟乃祖蘇頌復
佳兒蚌吐雙珠出蛇明兩劍垂長公真伯仲第五漫雄雌
苦厭浮名薄何關小隱凝歲星游戲是仙子謫居疑興寄
無功酒閒尋表聖棊撈補償估客匝面對名姬飲敵千人
失談鋒衆口資康成客不醉武子坐偏怡更嗜楊雲古仍
兼太史奇異形疏屬辨多識藻簾窺水氣捫周鼎山鑄究
禹碑哀來書畫帙秘若玖瓊枝集羽咸能翠探珠必得驪
世人誰具眼玄趣獨擅勝具尋峯通幽情選宅移茶寮
閑轉折藥畝種參差所愛惟柑橘嚴芟是蒺藜萬蘿交隱

几禽鳥傷垂帷客至沉沉酌僧來耿耿儀入林間見別出
世我人遺揚貴情偏適周顒德意良百年宜可駐一日顧
安之慟哭聞笙鶴冥飛見尾箕定將仙其佛不是死兼離
可悵風流隕誰言性即隨宋年湘米芾唐日喪王維酒社
緣真斷詩盟事亦聚小山叢桂冷老圃樹檀萼先生有園名之曰檀
賤子情無學先生獎不貲總難今問鑄仍守舊悲岐敢作
招魂賦非賡絕命詞

飲龍君御先生隱園賦謝短章兼致尊榮

白業開摩詰黃冠訪季真路尋三徑遠情共一丘親醫水
搖輕楫臨風整角巾人從今御李家是舊逃秦發口言無

雜掀髯笑欲頻入山魚得水狎清鳥依人坐卽捫經笥行
如遇石園自嘗題偃骨誰疑戲修脣著史閒追陸填詞偶
效辛喚隨車子嘒聽與雪兒新忽漫來飛雨因之浣素塵
一聲喧小海兩漿驀長津繞閣風無定窺簷氣欲勻舉杯
當日面開扇拂雲鱗醴酒荆王設葡萄魏帝珍傾筐寧款
謝投轄似過陳謔異鄱陽暴歌同郢里春門生行適越太
史故居鄞賤子懷鉛裔功曹入幕實已都無白眼何必有
青筠客次眠元亮神前醉伯倫一龍真矯矯三狗漫信信
七里行邊瀨千巖畫裏身雲煙揮在手鐘鼓聽非鄰洗鉢
如容我書裙會有因勉羞禪悅味蘭澤采芳蓴

雨次農談

楚宿纏朱鳥秦年見黑龍地鄰通水德天近接雲容樹角
微風起江臯遠雨從正愁聞細下小恨復全衝漸覺炎威
減先增喜氣濃震霆相吼勢雌霓獨摧鋒赤壤憐龜圻青
霄訝鶴蹤自非霑九里何以慰三農灑快晴嵐溼流驚涸
澤溶遠畦同渺渺卑坎故淙淙夜氣香凝稻朝霞錦著葑
滿泉咸飽滿甘露且勻霽水槩郊盈尺田收畝計鍾黃禾
秋健馬清酒晝嘗鱸穎粒詩人詠甌窶主客逢舉頭歡戢
戢張口笑喁喁一漑湯年審三移宋國兕何如五馬力不
伯九賜庸洗犖羣爲壽揮戈盡挽春民謠如可聽呼透白

雲封

園中覽物

遙看浮碧際身到亂暉暉草色步復嬾水風生亦微幽荷
卷新葉苦竹蒙初衣攬鏡赤側小當軒綠沉肥蕉心抽不
盡桑蓋團相依靜臥落花起熟來驚鳥歸鶯歌蝶有會鶯
睡鶯無機黍黍魚布藻刀刀燕剪幙蜂尋人耳鼻燈測樹
腰圍一徑可朝夕衆香難是非農談林外遞僧約雨中違
柳癭漱隨澗桃笙開近扉青山似亭午漠漠又雲飛

暮春十有九日始出東郊探得三肴七韻

依稀寒卉剪何以問春郊一握雲攀角雙跌海踏坳

東郊山有

角山海有
姜女石
梭龍飛更迫
栩栩蝶夢無交
斥塞驚馳羽
荒廬聽
抱茅積憂停
洒敵微尚假
移嘲嘆喈心
誰託支離骨
自敲
猶餘偶吟興
結習未能拋

漁仙寺卽古巖頭招提中有馬伏波石室及石梁聖

珠諸勝同賦一先五言十韻

沂水專尋石懷仙忽造禪
煙霞封理窟
筇笠帶因緣
小築
今漁隱荒祠
昔馬賢
梁橫據
鞍勢洞關止
戈年左澗從
饒
竹春珠白濺
泉腰鎌磨歲月
珥筆勒雲淵
我已六攜附
君
茲初扣舷勝心窮
虎跡高韵想
龍眠花老非
嬴代烽清別
漢天還吹寄生
笛莫和五溪篇

七言排律

八

五言絕句

山松曰先人此體詩亡者十九

發彭城

坎坎復簡簡
撾鼓船樓頭
憑樓一長嘯
氣入洪河流

二

旭日明春濤
晨風發清扇
瞥爾呂梁洪
飛湍去如箭

三

濁水波且駭
巨魚日咆彪
不聞櫂歌子
神語紛呶呶

雪

驚風來逐雪
斂避得所據
雪忽逐迴風
一身無避處

二

昨夜熟眠時展書直窻隙不覺雪封書寒多不曾液

七言絕句

鄱城書情

強著南冠賦北征尚書期赴隔年程誰憐遠道山川苦猶
自悲歌婦病行

山松日時先母夫人患病

二

相攜憔悴復間關悔脫牛衣泪欲涸十日停車人不識還
疑痛飲在中山

吳船卽事

三天竺上白檀香載得三吳窈窕娘不恨自教篙櫓折人且與看新妝

二

芙蓉小婦木蘭橈暗算郵籤弄小船鴛鴦湖邊期此夕禦兒溪畔定明朝

三

豪華蕩子惜朝昏按曲妖浮送酒尊向夜月斜人未醒船船燈火署高門

四

瓦提村釀直錢三泊處長年定一酣身醉江南渾不識學

人還唱望江南

五

平田六月半針秧不信湘南蓋隴黃
車上緩歌車下水隨風一夜過丹陽

桐城道中

黃梅已東楚山盡政復衮衮相尋來
眼磨興發忍費力幽鳥一聲翻可哀

二

不是向山不肯住俗駕拔山非所宜
尚書期可不顧耳已被古人先我爲

過皖公山

曾於白帝看仙掌
踏遍蒼茫總不如
今日五輪天外見
介人却憶華陰驢

二

蔥嶺不曾將履去
皖山猶說有衣傳
祇今無處叅宗髓
幾活看山總豎拳

絕句爲賀渭陽先生作

莫向尊前問井桐
詩情慘慄自秋空
稍憎綠減蕉花雨
漸覺紅多柏子風

二

自愛山深愜穩眠不因名動洛陽便
爐頭酒煖豚蹄熟知是兒孫又祝年

江南雜歌

余有舟沅江中時獨游南岸樂其謠俗因爲之詠
乃吾家江南非江南之江南也

江南路轉花千岐策杖窺林隨所之
青藤蒙密一聲笛無處穩避騎牛兒

二

江南女兒纖手柔曉刈菜畦如刈頭
黃雞不肯啄青韭也愛煙煙色欲流

三

江南老翁屋團團風雨不出衣常乾
梁王廟對梁山見山雨山晴那得瞞

四

江南簫鼓動朝昏雞鶩豚蹄克廟門
梁家一姓分千字小婦抱兒翁抱孫

酬馬時良見戲

小幔輕車春未歸郎身浴竟得新衣
無勞指點河魁處列宿朝來上紫微

余以是日陞辭

二

芙蓉衫子石榴裳作實猶能共一房幸自不須長塵柄輪
君兒女已成行時時良諸姬皆在別館

盧龍曲

盧龍城下灤水碧水中鯽魚長一尺薊州名酒日夜來寒
宵倚歌曙煙白

二

盧龍直北關山長山頭一線白女牆口兒細弱堪騎羊羣
幕不能如襦褌

三

盧龍東望接榆關恰有寒風吹客顏一片芙蓉青不落路

長愁絕兔兒山

江陵晚渡

寒日汀洲煙霧輕
古隄疎柳隔江明
漁歌唱到無人處
遠雁微波相應聲

送人之江南

桃葉桃花共樹生
江南江北遠含情
桃花源上酌君酒
桃葉渡邊君莫行

溪上別王五之江東

人間何事足悲涼
酒盡花間溼腎腸
秦客本來無漢魏
一時驚起聽漁郎

送聶千里還渚官畢娶却來卜居武陵

秋兼涼雨上歸航曲曲梁山相送長君向習家賢女道不妨
千橘種龍陽

與朱生

爛雨渾如醉未醒
規衣相過稗田青
秋來飽飯真難事
試說今年八穀星

寄翦陂僧

山中夜夜聽秋雨
專待蘆花夾紙裘
將去葛衣聊借問
七觔何似重青州

與鄰人

雨冷風暄節物催小園秋種合深培朝來欲盡千畦非爲
問君家有棄灰

再游河湟

昨日輕舟今日驢看山如我亦渠渠誰能畫此川原美置
我其中更自如

二

荻麥畦通橘柚園西風吹袂綠翻翻羣行只趣山中伴怪
我當門駐小軒

三

紅菱出水足甘涼黃栗辭枝剝嫩香所得白觴剛尺許野

人盤盞奉君嘗

憶胡子灝題其舊貽詩卷之後

浪遠沙遲理夢初東吳南楚各孤蘆故人相憶只相憶莫
責鯉魚能飯書

二

無可憑將半面難舊題詩卷索重看三千里外秋風起未
必蕭蕭是兩般

崇禎己巳冬日以事至孟津南岸遙望河陽憶萬曆
丁未罷公車却之長安官舍問津於此今二十三
年矣感而題壁

煙水茫茫到客身
方舟疑岸若無因
西風試問河陽柳
二十三年是故人

陳鄰玉歸過西湖
詫我勝游兼逢朱翁
有煙霞高致
詩以寄之

恰到蘇隄正好春
一湖物色快當身
又逢海上三山客
却傲榆關萬里人

過居庸關題壁

山永得代再叨宣
雲之役疏請陞見
將求省親弗許
出居庸關有感
泣書一章冀聞者
見者讀之傷
心意不在詩也

四載盧龍古塞間君恩未報隔親顏可憐半白頭鬚蚤又
出居庸百二關

二

九折驅車鬢已斑傷心忠孝兩難攀三年老父表州戍何
日天恩肯放還

卜失免諸部屬□款關蓋俺答之後也過殺虎口呼
入撫之渠以羊酥爲獻答之茶布種種藉地飲食
良久乃去

羊羣耳臂牽絲一寸凝酥似口脂聞說先朝封俺答今
朝摩頂問□兒

懷安雪中

鴉鴉聲斷野田楊曲曲
蝸涎成路遙解得散花
天女意遮
晴水際與山澗

沙邏夜泊聞灘聲

片霞初月蓋疎蓬
驟雨驚雷入夜風
不爲榜人催早起
爭知欹枕半灘中

歸舟問桃川宮風雨阻游寄題

青鞋處處點苔封
何事花間不著儂
道是秦人方作歲
暗將風雨妒行踪

臥聞疎雨滴寒江自到明來不啓窓分付仙人休却掃誰
拋屐齒一雙雙

三

驚風昨夜斂晴霞楚雨巫雲暗一家不向漁郎詢去處情
知別洞有胡麻

四

輕舟來去覓仙庭鎖却雲房一抹青二十五年纔六過可
能幽怨不惺惺

送子漸叔之金陵口號

燕市過從竟寂寥鳳城秋半入迢迢心隨一片橫塘水似

有情人在板橋

襄陽送兒山松歸里時在督師軍中

無復山公載酒心
帳前矛戟但森森
天恩欲洗蒼生血
夜夜焚香漏水深

山松曰先人在軍每夜焚香告天曰聖主恩波深似海蒼生命脈禱於天

二

一瓣香然報主心
天人相對感陰森
不知弱海填多少
精衛元無問淺深

楊文弱先生集卷之五十五終

曾孫 紉授梓